

Frá samstarfsnefnd



Samstarfsnefnd um sameiningu Reykjavíkur og Kjalarneshrepps leggur til, að Kjalarneshreppur og Reykjavík verði sameinuð og kosið verði um sameiningartillöguna 21. þessa mánaðar í báðum sveitarfélögum.

Að mati nefndarinnar er sameining sveitarfélaganna nauðsynleg forsenda þess að byggð þróist eins og hagkvæmast er, en henni séu ekki settar skorður af sveitarfélagamörkum. Sameiningin tryggir áframhaldandi uppbyggingu Grundarhverfis á Kjalarnesi, þjónusta þar verður eflað, þar með talin þjónusta við aldraða, ýmsum nauðsynlegum framkvæmdum flýtt og útsvarsgreiðslur og ýmis þjónustugjöld lækka frá því sem nú er. Þá mun þróun byggðar í Reykjavík breytast frá því sem gert hefur verið ráð fyrir, en tillögurnar fela í sér að byggt verði með strandlengjunni til norðurs og mun byggingarland verða nægjanlegt í Reykjavík um langa framtíð.

Umtalsverð samvinna hefur átt sér stað á milli Reykjavíkur og Kjalarneshrepps á liðnum árum. Hitaveita Reykjavíkur annast sölu vatns á Kjalarnesi og hreppurinn er að mestu innan dreifikerfis Rafmagnsveitu Reykjavíkur. Þá er Sjúkrahús Reykjavíkur einn stærsti vinnuveitandi á Kjalarnesi.

Reykjavíkurborg á nú þegar all mikið land í Kjalarneshreppi. Á árinu 1989 var gerður samningur milli Reykjavíkurborgar og Kjalarneshrepps um urðun sorps á Álfsnesi. Að fengnu leyfi hreppsnefndarinnar til urðunar keypti Reykjavíkurborg Álfsnesjörðina. Í samningnum var tekið fram að Reykjavíkurborg væri skylt að kaupa þær jarðir á Álfsnesi, sem næstar væru urðunarstaðnum kysu landeigendur að selja jarðir sínar. Eigendur Leira og Vogs á Álfsnesi ákváðu að nýta sér rétt sinn og keypti Reykjavíkurborg þær jarðir, en áður átti borgin land Víðiness á Álfsnesi og jarðirnar Saltvík og Arnarholt.

Könnunarviðræður um sameiningu Kjalarneshrepps og Reykjavíkur hófust í fyrrahaust, þeim lauk með því að gengið var frá samkomulagi milli Reykjavíkur og Kjalarneshrepps hinn 14. mars s.l., þar sem ákveðið var að kanna með formlegum hætti möguleika á sameiningu sveitarfélaganna á grundvelli 108. gr. sveitarstjórnarlaga nr. 8/1986. Hvor sveitarstjórn kaus tvo fulltrúa í samstarfsnefnd um sameininguna, en í samkomulaginu var jafnframt kveðið á um, að tillögur nefndarinnar ásamt greinargerð skyldu lagðar fyrir sveitarstjórnirnar í maímánuði 1997.

Verði sameining samþykkt í báðum sveitarfélögum skal þegar í stað taka til starfa vinnuhópur, skipaður tveimur fulltrúum frá hvoru sveitarfélagi, sem skal fjalla um fjármál Kjalarneshrepps og þær framkvæmdir, sem nauðsynlegt er að ráðast í á Kjalarnesi á yfirstandandi kjörtímabili.

Samhliða sveitarstjórnarkosningum 1998 skulu Kjalnesingar kjósa þrjá fulltrúa og þrjá til vara til setu í samstarfsráði Kjalarness, en borgarstjórn skipar tvo fulltrúa í ráðið og tvo til vara. Ráðið skal vera ráðgefandi fyrir borgarstjórn um málefni Kjalarness og sérhagsmuni þess borgarhluta. Einn fulltrúa Kjalnesinga í samstarfsráðinu skal jafnframt eiga seturétt með málfrelsi og tillögurétti á fundum skipulags- og umferðarnefndar, þegar nefndin fjallar um aðalskipulagsmál Reykjavíkur og deiliskipulagsmál Kjalarness á næsta kjörtímabili. Þannig eru Kjalnesingum tryggð áhrif í þeim málum er þá varða sérstaklega.

Kynningarfundir hafa verið haldnir í báðum sveitarfélögum og samstarfsnefndin hvetur íbúa sveitarfélaganna til að kynna sér tillögurnar.

Ingibjörg Sólrún Gísladóttir

Pétur Friðriksson

Ární Sigfússon

Kolbrún Jónsdóttir



Augljóst dæmi um beggja hag

Sameining Reykjavíkur og Kjalarneshrepps hefur umtalsverða kosti í för með sér fyrir bæði sveitarfélögin.

Sameiginlegur ávinningur:

- Fjölbreyttara atvinnulíf.
- Margbreytilegra búsetuform.
- Matvælaframleiðsla á svæðinu styrkt.
- Eðlileg tengsl landbúnaðar og þéttbýlis.
- Tækifæri til eflingar ferðaþjónustu.
- Hvatning til framfara í umhverfismálum.
- Greiðari samgöngur með tilkomu Sundabrautar.

Ávinningur Kjalnesinga:

- Aðgangur að allri þjónustu er borgin veitir.
- Betri leikskóli - betri grunnskóli - bætt íþróttastaða.
- Almenningsamgöngur eflast og verða hluti af leiðakerfi SVR.
- Efling byggðar á Kjalarnesi.
- Útsvarsgreiðslur og ýmis þjónustugjöld lækka.

Ávinningur Reykvíkinga:

- Aðgangur að nægilegu byggingarsvæði um langa framtíð.
- Ný svæði undir atvinnurekstur.
- Nýjar áherslur í skipulagsmálum.
- Fjölbreyttari kostir í búsetu.
- Bætt skilyrði til útivistar.

Íbúar beggja sveitarféлага eru hvattir til að taka afstöðu til sameingar og kjósa.

Með því að samþykka sameiningu geta Reykvíkingar lagt sitt af mörkum til að tryggja eðlilegan vöxt og viðgang borgarinnar.

Með því að samþykka sameiningu öðlast Kjalnesingar hlutdeild í fjölbreyttri þjónustu á öllum sviðum.

Kjalnesingar leggja meira land af mörkum en Reykvíkingar

Verði tillagan samþykkt tvöfaldast landsvæði hins sameinaða sveitarfélags. Kjalarneshreppur leggur til um það bil 14.300 hektara lands, þar af er byggingarland að fjallsrótum 3.600 hektarar. Reykjavík er um 10.000 hektarar þar af er byggingarland um 5.000 hektarar.

Reykvíkingar leggja til fleira fólk en Kjalnesingar

Íbúar í Reykjavík 1. desember 1996 voru 105.487 en íbúar Kjalarness 506.




Reykjavík
Kjalarneshreppur

Sameining!



Sameining sveitarfélaga er í takt við breytta tíma

Tala sveitarfélaga á landinu 1703-1997



Kjörstaðir

Í Kjalarneshreppi: • Fólkvangur

Í Reykjavík: • Árbæjarskóli
• Fellaskóli / Breiðholti
• Foldaskóli / Grafarvogi
• Laugardalshöll
• Ráðhús Reykjavíkur

Auk þess sem kjörfundir verða á Grund, í Hátúni 12 og á Hrafnistu



Samstarfsnefndin

Kjördagur laugardaginn 21. júní '97

Kjörstaðir opnir frá kl. 10⁰⁰-22⁰⁰